

Evening Dogri News Bulletin, 01 June 2025

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

- 1 केंद्री मंत्री डॉ. जितेंद्र सिंह होरें अज्ज डोडा जिले दे भद्रवाह च 2 रोजा खुशबोई आहले बूहटें सरबंधी लैवेंडर फेस्टिवल दा उद्घाटन कीता।
- 2 जम्मू-कश्मीर अपनी पार्टी दे लीडरें अज्ज श्रीनगर च उपराज्यपाल मनोज सिन्हा हुदे कन्नै मलाटी लाई।
- 3 कश्मीर घाटी च लग्गने आहले माता खीर भवानी मेले च शिरकत करने लेई ज्हारां बद्दे श्रद्धालु अज्ज जम्मू थमां रवाना होए।
- 4 जम्मू-कश्मीर दे सैलसफा मैहकमे आसेआ कल्लै थमां लेइयै 5 जून तगर सतवारी च आमंत्रण च डोगरी फूड फेस्टिवल दा आयोजन कीता जा'रदा ऐ।
- 5 ते औदे 78में स्वतंत्रता दिवस दे उपलक्ष्य च केंद्र सरकार नौजो नें लेई बक्ख-बक्ख मकाबलें दा सरिस्ता करा'रदी ऐ।

<><><><><><>

Lavender-Festival

CSIR-IIIM जम्मू आसेआ आयोजित त्रिया खुशबोई आहले बूहटें सरबंधी लैवेंडर फेस्टिवल अज्ज डोडा जिले दे भद्रवाह सरकारी कालेज च रम्भ होआ। इस महोत्व दा उद्घाटन केंद्री राज्यमंत्री डॉ. जतिंद्र सिंह होरें कीता। इलाके च लैवेंडर दी राई-बाई दी कामयाबी ते बद्ददियें संभावाएं दा जश्न मनाने ताई लोआए गेदे इस कार्यक्रम च लैवेंडर दियें फसलें ते एहदे कन्नै बने दे तेलें, साबलें ते खूबसूरती बदाने च इस्तेमाल कीते जाने आहिलयें वाजब कीमतें दियें चीजें-बस्तें गी दस्सने-दसाने आहले स्टाल लाए गेदे हे। डॉ. सिंह होरें लाए गेदे इनें बक्ख-बक्ख स्टालें दा दौरा लाया ते मकामी करसानें ते उद्यमियें दियें कोश्टें दी सराहना कीती। अपने संबोधन च डॉ. जतिंद्र सिंह होरें करसानें आसेआ रिवायती फसलें थमां अपना राँ बदलदे होई मते मुल्ल आहली लैवेंडर दी खेती बक्खी औने दी सराहना कीती। श्री सिंह होरें आखेआ।

<><><><><><>

LG-JKAP-Delegation

जम्मू-कश्मीर अपनी पार्टी दे इक प्रतिनिधिमंडलै मोहम्मद दिलावर मीर हुंदी नुमायंदगी च श्रीनगर च उपराज्यपाल मनोज सिन्हा हुंदे कन्नै मलाटी लाई। इस दौरान प्रतिनिधिमंडल च शामिल मोहम्मद अशरफ मीर, रफी अहमद मीर, हिलाल अहमद शाह, अब्दुल मजीद पड्डर ते मुंतजिर मोहीउद्दीन होरें पास्तिन आसेआ बिजन कुसै कारण गोलाबारी कारण प्रभावित परोआरें दी भलाई-बेहतरी, सैलसफा गी बढ़ावा देने ते आपदा प्रबंधन सरिसते गी निग्गर करने सने आम लोकें कन्नै जुड़े दे महत्वै आहले बक्ख-बक्ख मुद्दें पर लौ पाई गई। उपराज्यपाल होरें उनेंगी यकीन दोआंदे होई आखेआ जे गल्लकत्थ दौरान पुट्टे गेदे मुद्दें दे हल लेई बरकदियां गैई पुट्टियां जाडन।

<><><><><><><>

Kheer Bhawani Mata

सख्त सुरक्षा बंदोबस्तें बश्कार 60 बसें दे काफलें च सैकड़ें बद्दे लोक जिंदे च मते सारे कश्मीरी पंडित हे, अज्ज जम्मू थमां कश्मीर घाठी च गांदरबल तुलामुला लेई खीर भवानी मेले च शामिल होने लेई रवाना होए। एह मेला कश्मीरी पंडित समुदाय दा सब्बनें शा बड्डा धार्मिक आयोजन ऐ। एह मेला 3 जून गी गांदरबल जिले दी तुलामुला थाहर माता खीर भवानी मंदर च आयोजित कीता जाग। आकाशवाणी दे जम्मू संवाददाता नै दस्सेआ ऐ जे मेला मंगलवार गी गांदरबल दे तुलामुला, कुलगाम दे मंजगाम ते देवसर, अनंतनाग दे लोगरीपोरा ते कुपवाड़ा दे टिक्कर च 5 रागन्य भगवती मंदरें च आयोजित कीता जाग।

<><><><><><><>

WKC-Raising Day

सेना दी व्हाइट नाइट कोर नै अज्ज जम्मू दे नगरोटा इलाके च अपना 53मां स्थापना दिवस मनाया। इस मौके पर 16 कोर दे जीओसी लेफ्टिनेंट जनरल पी.के मिश्रा होरें अश्वमेघ शौर्य स्थल पर वीर जवानें गी श्रद्धाञ्जलि भेंट कीती। इस दौरान शौर्य स्थल पर 108 फुट उच्चा राश्ट्री झंडा फहराया गे। जेड़ा भारती फौज दे राश्ट्रवाद, एकता ते देसै बक्खी बिजन कुसै स्वार्थ दी सेवा भावना गी दस्सदा ऐ। व्हाइट नाइट कोर दी स्थापना पहली जून 1972 गी कीती गई ही। कोर नै अजे तगर च तक्कवाद विरोधी अभिजानें सने नेकें अभियानें च सराहनेजोग प्रदर्शन कीता ऐ।

<><><><><><><>

Summer-Vacation

स्कूली शिक्षा निदेशालय जम्मू आस्सेआ जम्मू खिते दे गर्मिं आले जोन च पौने आले सारे सरकारी ते निजी स्कूलें लेई गर्मिं दी छुट्टिं दी घोशणा करी दिती ऐ। स्कूल 7 जून थमां 16

जुलाई 2025 तगर बंद रौहगंन। छुट्टिएं च अध्यापक ऑनलाइन परामर्श विद्यार्थिएं गी लोड मूजब देई सकदे न। नियम दी खलाफवर्जी करने आहलें खलाफ सख्त कारवाई कीती जाई सकदी ऐ।

<><><><><><>

Tourism-Jammu

जम्मू कश्मीर दा सैलसफा मैहकमा कल 2 जून थमां 5 जून 2025 तगर सतवारी आमत्रंज च डोगरी फूड उत्सव दा सरिस्ता करा करदा ऐ। इस कार्यक्रम च डोगरी फूड विलेज रिवायती मिट्टी दे भांडे, मेहंदी कला ते इत्थें ऊंट दी सुआरी बी शामिल होग। एह मकामी संस्कृति ते पकवान दा इक शानदार समारोह होग। सैलसफा मैहकमे नै मकामी बसनीकें ते सैलानिएं गी डोगरी पकवान दे सुआद दा नंद ठोआने ते इस नूठी सांस्कृतिक कार्यक्रम च हिस्सा लैने लेइ साद्दा दिता ऐ। तोआई सैलसफा मैहकमा 4 जून वीरवार गी भद्रवाह सांस्कृतिक संध्या दी मेजबानी बी करा करदा ऐ। एहदे गीत संगीत कार्यक्रम शामिल होग, एह सत्र किश मकामी संस्कृति दे शानदार प्रदर्शन दा बादधा करा करदा ऐ। मकामी कलाकार लोकें दा मन परचाने लेई मंच पर आंगन। बसनीकें ते सैलानिएं गी डोडा जिले दी सनाकड़ी भद्रवाह घाटी च इस उत्सव च शामिल होने लेइ साद्दा दिता गेआ ऐ।

<><><><><><>

Various Competition

औंदे 78में सुतंत्रता दिवस दे उपलक्ष्य च केंद्र सरकार अज्जै थमां नौजोआनें ताई बक्ख-बक्ख मकाबलें दा सरिस्ता करा करदी ऐ। इनें मकाबलें तहत दऊं भाशाएं च निबंध प्रतियोगिता करोआई जा करदी ऐ जेदा विशे ऐ आपरेशन सिंदूर-आतंकवाद खलाफ भारत दी नीति गी नमें सिरेआ परिभाशित करना। दुई प्रतियोगिता च सरकारें उभरा करदे सोशल मीडिया कन्नै जुड़े दे लोकें गी भारती सुतंत्रता दे कुसै बी स्मारक ते थाहरें पर अपनी सैर दा वीडियो ते रील बनाने दा साद्दा दिता ऐ ते इक्क पेंटिंग प्रतियोगिता बी इससै कार्जक्रम तहत करोआई जाग। इस सरबंधै च मती जानकारी लेई हिस्सा लैने दी इच्छा रखने आहले 'My Gov' दी वेबसाइट पर जाई सकदे न। सब्बै मकाबले रक्षा मंत्रालय ते "My Gov India" दे सहयोग कन्नै आयोजित करोआइयां जा'रदियां न ते इस म्हीने दी 30 तरीक तगर खुल्लियां रौहडन।

<><><><><><>

Udh. Environment Day

भारत सरकार दे दिशा-निर्देशों मताबक औंदी 5 जून गी मनाए जाने आहले विश्व पर्यावरण दिवस दे उपलक्ष्य च जम्मू-कश्मीर प्रदूषण नियंत्रण बोर्ड आसेआ सरकारी डिग्री कालेज उधमपुर च पहलें गै इक्क अभियान रम्भ कीता गोआ। प्रदेश नियंत्रण बोर्ड दे मिम्बर सैकरेटरी घनश्याम सिंह हुंदी नुमायंदगी च जिले च जागरूकता कार्यक्रम दी शुरूआत कीती गई जेड़ा 5 जून तगर जारी रौहग। एह पहल प्लास्टिक प्रदूषण गी वैश्विक सतह पर खत्म करने दे सिरलेख पर केंद्रित ही जेदा मकसद लोकें टकोहदा करियै विद्यार्थियों च पर्यावरण सरबंधी मुद्दें बारै जागरूकता बढ़ाना हा। इस मौके बोलदे होई जम्मू-कश्मीर प्रदूषण नियंत्रण बोर्ड दे मिम्बर सैकरेटरी घनश्याम सिंह होरें आखेआ।

<><><><><><>

IPL

आईपीएल क्रिकेट दे दूए क्वालीफायर च अज्ज अहमदाबाद च 5 बारी दी चैंपियन मुंबई इंडियन्स दा सामना पंजाब किंग्स कन्नै होग। एह मैच संला साढ़े 7 बजे शुरू होग। मैच दी जैतू टीम मंगलवार गी अहमदाबाद च गै होने आले फइनल च रॉयल चैलेंजर्स बेंगलुरु कन्नै मकाबला करोग। मुंबई इंडियन्स नै हुन तगर 5 खिताब जिते दे न जदके पंजाब नै इक बारी बी खिताब नेई जिते दा ऐ।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया क्वरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 जून 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।